

《十住毘婆沙論》三十二相

於諸所尊迎送恭敬。於塔寺中大法會處說法處。供給人使故得手足輪相。有是相故。在家作轉輪聖王。多得人民。出家學道。多得徒眾。(手足輪相能轉法輪。)

所受諸法堅持不捨故得安立足相。有是相故無能傾動。(足安立相安住諸法。)

常修四攝法布施愛語利益同事故得手足網縵相。有是相故速攝人眾。(手足網縵相滅諸煩惱。)

以諸香甘美濡飲食供施於人及諸所尊供給所須故得手足柔軟相及七處隆滿相。有是相故多得香甘美軟飲食。(手足柔軟相說柔和法。)(七處滿相諸功德滿。)

救免應死及增壽命。又受不殺戒故得纖長指相足跟滿相身大直相。有是相故壽命長遠。(纖長指相長夜修集諸善妙法。)(足跟廣相眼廣學廣。)(大直身相說大直道。)

所受善法增益不失故得足趺高毛上向右旋相。有是相故得諸功德不退失。(足趺高相一切中高。)(毛上旋相能令眾生住上妙法。)

能以技藝及諸經書教授不惜及履屣等施故得伊尼鹿蹄相。有是相故諸所修學速疾如意。(伊尼鹿蹄相備漸鹿)

有來求索無所遺惜故得傭長臂相。有是相故能得勢力能大布施。(臂長過膝相。臂如金鋌。)

能善調人不令眾生親里遠離。若有乖離還令和合故得陰藏相。有是相故多得弟子。(陰馬藏相有法寶藏。)

以好淨潔衣服臥具樓閣房舍施故得金色相及皮膚薄相。有是相故得好淨潔衣服臥具樓閣房舍。(身金色相有無量色。皮細薄相說細妙法。)
隨所應供養和尚阿闍梨父母兄弟及所尊重善能衛護故得一一孔一毛生毛右旋相白毛莊嚴面相。有是相故無與等者。(一一毛相示一相法。)(白毫莊嚴面相樂觀佛面無厭。)

慚愧語隨順語愛語故得上身如師子相肩圓大相。有是相故見者樂視無有厭足。(師子上身相如師子無畏。)(肩圓大相善分別五陰。)

供給疾病醫藥飲食身自看視故得腋下滿相得味味相。有是相故身少疾病。(腋下滿相滿大善根。)(得味味相具足寂滅味。)

布施園林甘果橋梁茂樹池井飲食華香瓔珞房舍起塔福舍等及共眾施時能出多物故得身如尼俱樓樹相及肉髻相。有是相故得尊貴自在。(方身相破生死畏。)(肉髻相頭未嘗低敬。)

長夜修習實語軟語故得廣長舌相梵音聲相。有是相故得五功德音聲。五功德音聲者。易解聲。聽者無厭聲。深遠聲。悅耳聲。不散聲。(舌大相色如真珊瑚能自覆面。)(梵音相身相至梵天。)

長夜實語不綺語故得師子頰相。有是相故言必信受。(師子頰車相肩廣相能破外道。)

初既供養後不輕慢。隨意供給故得齒白相齒齊相。有是相故得清淨和順同心眷屬。(齒平等相平等心於一切眾生。)(齒齊相行清白禪)

長夜實語不讒謗故得四十齒相齒密緻相。有是相故眷屬和同不可沮壞。(齒密緻相離諸貪著。)(四十齒相具足四十不共法。)

深心愛念和顏視眾生無愛恚癡故得紺青眼相睫如牛王相。有是相故。一切見者無不愛敬。(紺青眼相慈心視眾生。)(牛王睫相睫長不亂。得希有色樂見無厭。)